

平園續藁卷第二十

廬陵周益國文忠公集六十

同邑裔孫連燭重刊

記碑

吉州錄參廳題名記

諸州錄事參軍於令爲從八品掌郡獄及軍資市令之政實曹掾之首富沙陳希黯以名公之子繼登儒科來官廬陵謂職有崇卑題名不可無記乃起高宗中興距今七十有八年得姓名二十七人求予一言將刻之石夫才有能否其時之事聲實顯晦後乃見之希黯用志亦遠矣予聞曹參在齊治道清靜比其去猶以毋擾獄市屬後人督郵有司也清靜何居予請著其說

假令罪在甲乙枝蔓丙丁擾也科抑賈區強之貳價亦擾也惟
毋縱故犯毋妄取舍使吏杜奸貪人安其業始可與言齊相之
意矣嘉泰三年四月望

敬思亭記

嘉泰三年三月乙酉登仕郎泰和蕭知節母夫人詹氏以疾終
享年六十六卜十月丙午葬本縣高行鄉龍角之原知節泣而
請曰先人諱遵不幸早世吾母素知書旣殽力教知節以學劬
躬立門戶輕財重義撫育宗族凡知節得出入公卿之門皆母
之教也今罔極之恩不可報矣築亭冢舍取祭義生則敬養死
則敬享思終身弗辱之訓榜曰敬思願賜語以寵綏之予聞夫

子論要道至德一本於敬是以孝子之祭其立其進其薦其徹
悉以敬爲主反是則爲固爲疏爲不愛爲敖爲忘本可謂詳矣
及子張乃一言以蔽之曰祭思敬蓋平居得於夫子者如此予
尙何云九月辛巳

筠州樂善書院記

舜命夔典樂首教胄子周大司樂治學政專合國之子弟是時
公卿大夫多出宗姓崇德象賢率於此乎取之本朝至道元年
以近屬繁衍初置學官於是教授之名立迨咸平迄祥符南宮
北宅復置侍教十歲已上併令肄業治平初增小學教授十有
二員此命名分職大畧也舊制七歲入小學能誦孝經論語升

大學又能誦兩經善書札宗正以聞熙寧元祐并勅諸院立小學八歲至年十四者歲檢舉焉自是厥後其制益詳此進德修業次序也南渡以來杭越首置諸王宮大小學教授西外南外並立宗學人知爲善之樂以蕩陵德者鮮矣今高安郡守王淹文正公旦六世諸孫也追惟文正被遇章聖徧歷要近與聞育才之本末思原德意不墜先烈乃與貳車玉牒希宰議卽郡庠之側創樂善書院外設重門東西兩廡廡各三齋中爲講堂三間列直舍於後廡庖器用備焉庀工嘉泰三年之季夏訖工於孟冬先下尊屬司選宗子幼而未命者以二十人爲額旣望率郡僚延處六齋齋各有名擇老成之士訓以經史教官總其課

別立一齋待不率教者市田千畝用足歲計屬某記之嘗聞關
雎基王者之化其應見於麟趾雖繫周公實美文王其在大雅
曰肆成人有德小子有造古之人無斁譽髦斯士是又盛言文
王遐不作人一視親疎可以傳無窮施罔極也恭惟祖宗作成
宗英越二百年聖皇在御推廣家法公族振振髦士峩峩將同
符於文王筠州復能助宣聖化無愧民之師帥是皆宜書故樂
爲之記明年正月旣望

杜氏潛光堂記

大畜之彖曰剛健篤實輝光日新其德洛誥曰惟公德明光於
上下蓋德有大小光亦隨之其積在身其發在人士固有幽潛

如韓退之所云者故四明理掾杜君諱褒字伯稱是也世居越之上虞以篤行著君苦心嗜學銳意事功紹興末北征條要務謁府帥湯岐公後帥史魏公大奇之交薦於朝再命以官嘗尉崇安力變不舉子之俗治獄至無一夫之冤遇大利害密裨其長罷行之陰德不可計妻張氏處爲孝女嫁爲孝婦相與力教諸子思恭旣擢第餘皆蹈義向方見推鄉評厥後合葬考妣於縣之葛山鄉寶謨閣待制陸務觀各爲之銘思恭復卽塋築堂務觀以潛光名之求記於予往者杜正獻公越人也歐陽子誌其墓曰春秋諸侯厯秦漢千有餘歲不絕世譜而唐盛時公卿家法杜氏獨存今務觀謂君本同譜牒中間失其世次爲可惜

也雖然左氏敘陳敬仲光遠而自他有耀又曰非此其身在其子孫惟君德充而實浮不耀其彰幸哉有子亶亶乎儒猷孜孜乎吏方是宜立身揚名顯前人之光何待退之而後發亦豈必遠耀於他邦乎茲爲肯堂也大矣嘉泰四年二月望

筠州判官廳記

國家以民之休戚政之臧否寄二千石其設官有亞有旅亞者倅也位逼未免於嫌意不盡者多矣掾曹旅也分職以治各司其局而已若乃事無不預而非逼職未嘗分而情通惟幕職爲然筠州判官王牒彥章南夫弟兄競爽同取科第以嘉泰壬戌七月實來持身正涖事明一郡嘉賴官廨在麗譙內蓋尙書郎

趙不遜茂中營造於紹興之庚午踰五十年敝當改爲前政周景南經始而不克至是太守王淹伯奮旣給竹木又出羨錢四十五萬米百斛俾南夫易而新之相其地形深纔十餘丈博則加倍乃列堂與廳並南向廳爲三間其後分東西兩齋榜曰壺天者禮部侍郎倪思正甫吏隱時所題也堂爲五間深明雅潔不侈不陋介於二者有古薌堂茂中爲叢桂設也稍東面西有尙絅堂南夫所創也九月庀工閱月而成予愛李觀元賓記常州判官袁師德廳謂前軒翬飛竹欄鳳食蓋由郡守韋公遇袁以善袁報韋以誠遂躋登茲今筠守甚賢捐費不吝幕下又賢居之也安善遇誠報賓主兩得惠政加乎千里豈有旣乎姑狗

其請爲之記四年甲子二月望

台州仙居縣學記

孔堂高弟猶分四科性與天道未嘗輕言世之學者乃欲德行
言語政事文學兼而有之其不可得而聞者每求於議論之間
往往名是實非言出而躬不逮此今昔通患也古靈先生陳公

諱慶

別本作襄

字述古福州侯官人時方以雕篆爲學獨與陳烈周

希孟鄭穆倡道海濱鄉人化之號四先生皇祐中令台州之仙
居篤意學校首爲文勸人讀書次諭以禮義之俗又擇明經之
士朝夕講說詢問大義間習程試高不躡等卑不流俗示之以
方期造於道而進取亦在其中士民懷之奉祠今百五十餘年

嘉泰辛酉夏通直郎四明林岳來治茲邑歆慕前哲凡庠序堂
廡門觀舉新之厥初祠宇庠下遷寘中門之右極其嚴潔刻公
遺文二十五卷得謝雨詩於斷碑增寘集中學有射圃淪棄榛
莽亦加雍葺別市民居創觀德亭總爲錢二千四百緡皆出節
用籍贓田十八畝輟務場餘財月萬錢以贍給生員請尉簿嘉
禾錢撫專主教導於是學職林宓呂咸陳頴不遠二千里以記
爲請夫教人必以聖人爲師古靈學夫子者也林君希古靈者
也學者誠能各因其材孜孜弗怠尊所聞而行所知豈特無負
賢令亦將無負先聖可不勉歟按國史古靈傳惟載其宰河陽
典數郡所至必務學校而令仙居則畧之是尤不可以不書也

四年甲子四月望

廣昌縣學記

盱江析臨川而爲軍廣昌又析南豐而爲邑其地極江西界接於閩疆秀民爲多初立學在縣獄之右紹興十七年令丞敷徙寘縣南郡丞劉嶸爲之記後五十餘年當嘉泰二年四月奉議郎曹進之來爲宰謁先聖殿上漏旁穿兩廡歆側且非其地邑士胡巖老請改築於縣治之東止戈亭舊基諸生相攸僉謀爲允於是進士揭英之子儼子儀三人輸財効力主其事而黃作舟作礪首捐錢四十萬爲之助士胥和之庀工癸亥之夏甲子春新學成培卑爲高以避水淹雙溪夾流滙爲大江面對羣峯

宛如圖畫高明堅壯他邑鮮儷進之予門生也求記勤甚予聞有學校之教有學校之文昔夫子折衷六藝自虞至周凡學校之教之文散於詩書禮樂之中故論語不復問答惟告門弟子曰入則孝出則弟謹而信汎愛衆而親仁教在其中矣行有餘力則以學文文在其中矣本朝開設學校復帝王之盛雖碩儒名卿布於中外而士之月書季考惟在舉業故時文無慮三變始因唐舊專用詞賦或曰雕篆無益也於是經義行焉專門一律又以爲病而大學中庸之說出時論愈高行之愈難爲師儒者旣用此爲去取士亦以此應之殆非國家孜孜求賢之本意也上方會其有極歸其有極士當是訓是行一變而至於道以

副教育則所謂文將不勝其用矣於科舉乎何有進之衡州耒陽人淳熙辛丑登科既視事金芝產廨中嘉禾生於野爲政亦可知矣四年五月日

撫州學記

晉唐以來撫守多名臣至本朝則儒宗鉅公相繼而生學校之盛固不待言歲久或敝敝又圖新理也雖然郡守主盟爲易教官任責也難慶元二年豫章胡君元衡來臨師席文風旣振復懷永圖乃大議葺治適學糧贏錢百二十萬太守陳侯研首捐千緡常平使者王君容及後守曾侯楷各助十之三漕憲繼之總錢又百三十萬米不在焉以六月甲寅興工明年八月訖事

凡大成殿御書閣講堂倉廩皆飾其舊內外門墻廊廡及正錄
職事之位東西序之六齋文昌之軒庖湢之所悉鼎新之或請
記其成太守曰教官力也弗許教官曰此二千石功也當書會
入官上庠亦復不果今數年矣先日學正鄉貢進士嚴滋以書
遺某前不求文教官謙也歲月雖久公論故存敢敬以請昔孟
子論傳道之序由堯舜至湯文皆五百餘歲由文王至孔子適
當其期故曰文王既沒文不在茲乎蓋自任也惜乎無時無位
不得見諸行事退修六藝以傳萬世今學者幸居學校讀六藝
之書旦旦而來望數仞之墻盍興及肩之嘆旣升其堂盍想聞
金石絲竹之音仰之彌高鑽之彌堅瞻之在前忽焉在後又當

希顏子苦孔子之卓夫如是晝而思之夜復思之則於道也其
庶矣乎墨池文祥姑存故事足矣嘉泰四年六月

廬陵縣學三忠堂記

文章天下之公器萬世不可得而私也節義天下之大閑萬世
不可得而踰也吉爲江西上郡自皇朝逮今二百年餘兼是二
者得三公焉曰歐陽公修以六經粹然之文崇雅黜浮儒術復
明遂以忠言直道輔佐三朝士大夫翕然尊之天子從而諡之
曰文忠莫不以爲然南渡搶攘右相杜充擁衆臣虜金陵守陳
邦光就降惟通判楊邦乂戟手罵賊視死如歸國勢凜凜士大
夫復翕然尊之天子從而褒贈之賜諡曰忠襄則又莫不以爲

然時宰議和衆論詢詢惟一編修官胡銓毅然上書乞斬相檜
使三綱五常賴以不墜士大夫復翕然尊之厥後天子從而褒
贈賜以忠簡之諡則又莫不以爲然是之謂三忠雖然此邦非
無宰相如劉沆冲之在朝嘗力薦文忠畱賓翰苑又引富文忠
公彌其政今姓名著在勲臣之令而諡則未聞子瑾孫簡俱爲
待制迄不能請矧被遇之從臣乎夫然後知節以壹惠天子猶
不敢專亦必士大夫翕然尊之乃可得耳廬陵宰趙汝厦卽縣
庠立三忠祠歲時率諸生祀焉巍巍堂堂衣服有章揭日月而
行天學者固仰其煒煌若夫百世之下聞清風而興起得無慕
休烈揚顯光者耶汝厦用意遠矣嘉泰四年八月日